

四庫全書

史部

欽定四庫全書

史部

畿輔通志卷四十五

詳校官監察御史<sub>臣</sub>劉人壽

檢討<sub>臣</sub>德生覆勘

總校官進士<sub>臣</sub>繆琪

校對官中書<sub>臣</sub>范鏊

謄錄舉人<sub>臣</sub>呂日永

欽定四庫全書

畿輔通志卷四十四

舖司

附

順天府

共舖司兵六百二十名每年共支工食銀三千八百一十八兩四錢

大興縣 正陽舖朝陽舖西流舖安定舖紅山舖下馬舖剪莊舖曹村舖青閨舖額設舖司兵三十一

名每年共支銀二百二十三兩二錢

宛平縣 施仁鋪彰義鋪義井鋪盧溝鋪新店鋪高  
店鋪田家莊鋪黃岱鋪石碑鋪雙線鋪胡渠鋪兵  
五十一名共支銀三百六十七兩二錢

良鄉縣 城東北為長陽鋪西南為重義鋪舊店鋪  
燕谷鋪兵二十五名共支銀一百五十兩

固安縣 城南為柳泉麟塢鋪北為東王鋪額設鋪  
司兵二十名每年共支銀一百二十兩

永清縣 城南為馬家鋪北為火燒鋪額設鋪司兵  
九名每年共支銀五十四兩

東安縣 城東為馬圈鋪北為常角鋪祖哥鋪李家  
鋪額設鋪司兵十六名共支銀九十六兩

香河縣 城東為宣教寺鋪戴家閣鋪西為王家鋪  
高家鋪額設鋪司兵十名每年共支銀六十兩

通州 城東為召里店鋪西南為高麗莊鋪西為東  
留村鋪又西為大黃莊鋪舊潞縣城北為宋家鋪

郭家鋪南為黃場鋪得仁務鋪兩家店鋪額設鋪司兵五十四名每年共支銀三百二十四兩

三河縣 城東為石牌鋪段家嶺鋪西為白浮圖鋪泥窪鋪夏店五槐鋪馬已乏鋪烟郊鋪額設鋪司兵五十六名每年共支銀三百三十六兩

武清縣 城東南為蔡村鋪桃花口鋪西南為新莊鋪馬百戶屯鋪西北為巨城鋪泃水鋪額設鋪司兵二十二名每年共支銀一百三十二兩舊有三

家茅店舖在縣東南今廢

寶坻縣 城西為朱家莊舖崔家莊舖額設舖司兵  
十名每年共支銀六十兩

昌平州 城東為新莊舖麻峪舖牛房舖橋子舖赴  
任舖石槽舖抱榆舖新峰舖南為沙屯舖半壁店  
舖回龍舖清河舖西龍虎舖南口舖達居庸關額  
設舖司兵三十四名每年共支銀二百零四兩舊  
有長坡舖南口舖雙塢舖皂角舖榆河舖清河舖

唐家嶺等鋪今改置

順義縣 城西南為內政鋪孫復鋪西為牛家莊鋪  
渠河鋪高麗營鋪北為向陽鋪牛欄山鋪額設鋪  
司兵二十四名每年共支銀一百四十四兩

密雲縣 城東為八里鋪西為塔院鋪北為神仙鋪  
星莊鋪陳家莊鋪青陽鋪東北為高嶺鋪王店鋪  
北口鋪額設鋪司兵十九名每年共支銀一百一  
十四兩



懷柔縣 城東為小務鋪王家鋪東南為年豐鋪額  
設鋪司兵十五名每年共支銀九十兩又城東一  
百里有松棚鋪

涿州 城北十里為湖梁鋪北達 京師南為管頭  
鋪為樓桑鋪為三家店鋪東十里為柳窩營鋪西  
為馬村鋪又魯家莊鋪路出紫荆關西南為松林  
店鋪澤畔鋪路出保定府額設鋪司兵六十一名  
每年共支銀三百六十六兩

房山縣 城南為挾河鋪額設鋪司兵十名每年共支銀六十兩

霸州 城內為州前鋪城北為南孟鋪東為辛店鋪南為莫金鋪額設鋪司兵十二名每年共支銀七十二兩

文安縣 城東為太平洲鋪西為孫村鋪額設鋪司兵九名每年共支銀五十四兩

大城縣 城東南為趙扶鋪西為鄧家務鋪額設鋪

司兵十名每年共支銀六十兩

保定縣 城東為路疇鋪西為西陽鹿疇鋪西南為  
柏木橋鋪額設鋪司兵九名每年共支銀五十四  
兩

薊州 城東為黃土坡鋪遼山鋪馬伸橋鋪臨河鋪  
南為八里鋪獻橋鋪又南為別山鋪城西為十里  
鋪大柳樹鋪又西為邦均鋪額設鋪司兵六十名  
每年共支銀三百六十兩

平谷縣 城南為辛店鋪北為夏箭務鋪額設鋪司  
兵十一名每年共支銀六十六兩

遵化州 城東為鐵山嶺鋪雙城子鋪金山寺鋪袁  
家屯鋪盧兒嶺鋪南為新店鋪黨峪鋪西南為平  
安城鋪西為七里鋪沙河鋪義井鋪石門鋪額設  
鋪司兵四十五名每年共支銀二百七十兩

永平府

共鋪司兵一百九十一名每年共支工食銀一千

一百二十七兩

盧龍縣 城東為周家鋪第二鋪雙望鋪南為周玉山鋪劉家莊鋪西為石梯子鋪白佛院鋪赤峰鋪西北為分水嶺黑石鋪額設鋪司兵三十五名每年共支銀二百一十兩

遷安縣 城南為沙河鋪四十八里有西徑為黑崖子鋪東為沙窩鋪色山鋪馬波鋪岳榆鋪西北為龍起鋪金山院鋪羅家屯鋪大寨鋪舊城鋪白廟

舖西北一百十里有灰嶺舖孩兒嶺舖出口外額  
設舖司兵十七名每年共支銀一百零二兩

撫寧縣 城東為橫山舖馬坡舖深河舖團山舖張  
果老村舖豐千臺舖紅花店舖遷安舖又東北達  
山海關界城西為綠灣舖蘆峰口舖背陰舖額設  
舖司兵三十名每年共支銀一百八十兩

昌黎縣 城西為石堠子舖梭頭灣舖營城舖訾家  
舖額設舖司兵十九名每年共支銀九十五兩城

東北舊有張各莊鋪紅花店鋪今廢

灤州 城南為大柳鋪馬城鋪長寧鋪西北為甸子  
鋪忙牛橋鋪榛子鎮鋪根窩鋪鐵城坎鋪城北為  
劉家莊鋪額設鋪司兵三十三名每年共支銀一  
百九十八兩

樂亭縣 城西北為曹家莊鋪新樂鎮長寧鋪額設  
鋪司兵八名每年共支銀四十八兩

玉田縣 城東為韓家鋪兩家店鋪雙橋鋪西為來

亭橋鋪又西為孤樹鋪額設鋪司兵二十九名每年共支銀一百七十四兩

豐潤縣 城東為垠城鋪板橋鋪鐵城鋪西為七里鋪高麗鋪閭家鋪沙流河鋪西北為梁家務鋪黨峪鋪額設鋪司兵二十名每年共支銀一百二十兩

保定府

共鋪司兵三百八十六名每年共支工食銀二千



二百八十兩

清苑縣 城東解家莊鋪新安鋪東南為百塚鋪又  
南為大冉鋪田家莊鋪張登鋪溫仁鋪城西為董  
家莊鋪又西南為小激鋪大激鋪城北為雙楊鋪  
額設鋪司兵六十名每年共支銀三百六十兩

滿城縣 城東為奇村鋪東北為要莊鋪兩漁鋪東  
南為受陵鋪又東南為賈村鋪南原村鋪西為毛  
山鋪抱陽鋪北為謁山鋪大冊鋪紫口鋪南為閭

童舖湯村舖孟村舖淡頭舖泥窪舖額設舖司兵  
二十四名每年共支銀一百四十四兩

安肅縣 城南為道澗舖漕河舖徐河舖西南為解  
村舖樊村舖孫哥莊舖大王店舖西北為高哥莊  
舖遂城舖東關舖北為白塔舖田村舖額設舖司  
兵五十一名每年共支銀三百兩

定興縣 城東為頭舖南為北河舖泥窰舖上及舖  
固城舖祖村舖額設舖司兵六十名每年共支銀

三百六十兩

新城縣 城南為雲北鋪魏家鋪東馬鋪西為界河  
鋪西南為馬村鋪北為衣錦鋪方官鋪西北為駐  
蹕鋪額設鋪司兵五十名每年共支銀三百兩

唐縣 城西北為河南鋪又五十里為軍城鋪青陽  
鋪又十里為北嶺子鋪令公鋪又十里為龍拔鋪  
達山西界額設鋪司兵十六名每年共支銀九十  
六兩

博野縣 城北為油李鋪又北為陶墟店鋪又北為  
溫寅鋪達清苑縣界額設鋪司兵六名每年共支  
銀三十六兩

慶都縣 城西南為戚店鋪固店鋪達定州之清風  
店東北為十里鋪達滿城縣又北為穰村鋪達清  
苑縣額設鋪司兵三十名每年共支銀一百八十  
兩

容城縣 城之東為王祥鋪南為胡村鋪西為南張

鋪額設鋪司兵十名每年共支工食銀六十兩

完縣 額設鋪司兵五名每年共支工食銀三十兩

蠡縣 城西為辛橋鋪額設鋪司兵八名每年共支

工食銀四十八兩

雄縣 城之南為郝莊鋪又東南為郭莊鋪西為楊  
定鋪北為王克鋪又為韓家鋪五鋪共額設鋪司  
兵二十五名每年共支工食銀一百五十兩

祁州 城東北為王家莊鋪抵府南為東固鋪婁底

鋪抵深澤縣額設鋪司兵十名每年共支工食銀六

十兩

東鹿縣 城北為舊城鋪西北為泊莊鋪玉山鋪額  
設鋪司兵八名每年共支領工食銀四十八兩

安州 總鋪在州治西城西南為邊吳鋪沱上鋪南  
為陶口鋪額設鋪司兵六名每年共支工食銀三  
十六兩

高陽縣 城東南為利家口鋪小連口鋪西為野王

鋪進莊鋪額設鋪司兵十五名每年共支銀九十兩

新安縣 城南為馬家鋪又名馬鋪有便民橋渥易

二水所經額設鋪司兵二名每年共支銀十二兩

### 河間府

共鋪司兵二百二十七名每年共支工食銀一千三百六十二兩

河間縣 城東有山寒鋪南為八里鋪侯村鋪東南

為梁家鋪西南為喬城鋪北為二十里鋪三十里鋪額設鋪司兵四十一名每年共支銀二百四十

六兩

獻縣 城東為趙二莊鋪杜生鋪蔡村鋪南為單橋鋪馬頰鋪郝家鋪北為馮村鋪商家林鋪額設鋪司兵三十名每年共支銀一百八十兩

阜城縣 城南為御莊鋪許家鋪漫河鋪北為劉濟鋪額設鋪司兵十六名每年共支銀九十六兩



肅寧縣 城東為豐樂堡鋪李公莊鋪中堡村鋪南  
為張家莊鋪西為付家莊鋪額設鋪司兵二十名  
每年共支銀一百二十兩

任邱縣 城南為五里鋪沙村鋪閼張鋪石門鋪史  
村鋪新史鋪陶家鋪北為西梁鋪香城屯鋪韓莊  
鋪香城鋪司馬莊鋪帶河鋪黃壘鋪塔莊鋪沙灣  
鋪鄭市鋪朱家莊鋪棗莊鋪額設鋪司兵三十名  
每年共支銀一百八十兩

交河縣 城西為劉四鋪中范鋪又城西兩和鋪豆  
莊鋪額設鋪司兵十六名每年共支銀九十六兩  
寧津縣 城西為部套河鋪界首鋪額設鋪司兵十  
名每年共支銀六十兩

景州 城東為管莊鋪南為馬莊鋪讚福鋪北留智  
鋪南留智鋪北為孫莊鋪韓莊鋪額設鋪司兵二  
十六名每年共支銀一百五十六兩

吳橋縣 城東為大王鋪王孝鋪一名溝店鋪西為

官莊鋪一名樓子鋪安陵鋪額設鋪司兵十六名  
每年共支銀九十六兩

東光縣 城南為連鎮鋪馬家寨鋪北為王家集鋪  
額設鋪司兵十二名每年共支銀七十二兩

故城縣 額設鋪司兵十名每年共支銀六十兩

天津府

共鋪司兵一百三十四名每年共支工食銀八百  
零四兩

天津縣 額設鋪司兵二名每年共支銀十二兩

青縣 城東南為窩子口鋪興濟鋪安堵寨鋪西南  
為本門鋪崇仙鋪杜林墓鋪陳預鋪長莊窠鋪北  
為蓋宿鋪流河鋪空城鋪北柳鋪額設鋪司兵三  
十八名每年共支銀二百八十兩

靜海縣 城南為雙塘鋪釣臺鋪辛莊鋪北為獨流  
鋪王莊鋪辛口鋪又北為楊柳青鋪稍直口鋪又  
東北為小直沽鋪額設鋪司兵二十六名每年共

支銀一百五十六兩

滄州 城東為盧家園鋪東南為汪家鋪沈家鋪舊  
滄州鋪李家鋪南為捷第鋪尚家坑鋪北為朱家  
墳鋪橫堤鋪額設鋪司兵三十六名每年共支銀  
二百一十六兩

南皮縣 額設鋪司兵十二名每年共支銀七十二  
兩

鹽山縣 城東為南褚村鋪高家灣鋪東南為大王

舖移豐舖望樹舖百尺杆舖南召舖崔家口舖南  
為孟家店舖西南為帽架園舖張村舖高莊舖西  
為郭村舖西北為新店舖孫周舖北為北趙村舖  
常郭舖韓村舖東北為邊家務舖北楮村舖舊城  
舖丁村舖海豐舖蘇基舖東趙村舖楊二莊舖海  
下舖額設舖司兵十二名每年共支銀七十二兩  
慶雲縣 城東南為紀家舖火燒舖二郎舖西為五  
里舖壯里舖山雲舖額設舖司兵八名每年共支

銀四十八兩

正定府

共鋪司兵三百一十五名每年支工食銀一千八百七十二兩

正定縣 城南為五里鋪十里鋪石家莊鋪壇馬鋪  
西南為柳林鋪北為七里鋪十里鋪北牛鋪新城  
鋪額設鋪司兵五十名每年共支銀三百兩

獲鹿縣 城東為趙寨鋪安舍鋪趙陵鋪東南為荆

壁鋪西為土門鋪胡神鋪額設鋪司兵三十名每  
年共支銀一百八十兩

井陘縣 城東為西河鋪橫口鋪白石嶺鋪上安鋪  
下安鋪西為板橋鋪龍窩鋪界侯鋪額設鋪司兵  
四十名每年共支銀二百四十兩

阜平縣 城東為尚書莊鋪王槐鋪額設鋪司兵八  
名每年共支銀四十八兩

樂城縣 城南為東鞏鋪北為董保鋪程上鋪額設



鋪司兵四十名每年共支銀二百四十兩

行唐縣 城南為白廟村鋪半壁店鋪北為齊村鋪  
賈村鋪龍岡村鋪額設鋪司兵十二名每年共支  
工食銀七十二兩

靈壽縣 城東南為木佛鋪達本府正定縣界額設  
鋪司兵六名每年共該支領工食銀三十六兩

平山縣 城東十里為段柳鋪達本府正定縣界額  
設鋪司兵六名每年共支領工食銀三十六兩

元氏縣 額設鋪司兵十一名每年共支工食銀四十八兩

贊皇縣 城東二十五里為邢郭鋪達趙州高邑縣界額設鋪司兵十五名每年共支工食銀九十兩  
新樂縣 城東十里為田村鋪又三里為王店鋪達定州界南十里為小寨鋪又十里為同嘗鋪又五里為馬頭村鋪又五里為蘭渠鋪達藁城縣界北八里為梁莊鋪又七里為安莊鋪達曲陽縣界額

設舖司兵四十六名每年共支工食銀二百七十  
六兩

晉州 城東十里為大王舖東南二十里為呂家莊  
舖又五里為新莊舖達東鹿縣界東北十五里為  
光榮舖又十五里為東曹舖達深澤縣界西北為  
于家莊舖西十五里為蘇家莊舖又五里為青魁  
舖又十五里為王家莊舖又三十里為小史舖額  
設舖司兵二十五名每年共支工食銀一百五十

兩

無極縣 城西南三十里為幞頭店鋪達藁城縣界  
額設鋪司兵八名每年共支工食銀四十八兩

藁城縣 城西北一十里為四公鋪又二十里為堤  
里鋪又四十里為吳村鋪達保定府新樂縣界額  
設鋪司兵十八名每年共支工食銀一百零八兩

順德府

共鋪司兵二百一十九名每年共支工食銀一千

三百一十四兩

邢臺縣 城東為張村鋪達任縣界東南為靜安鋪  
又東南為新鋪達南和縣界又南為康莊鋪達沙  
河縣界北為石橋鋪又北為荆村鋪又北為崇雅  
鋪達內邱縣界額設鋪司兵共六十名每年共支  
銀三百六十兩

沙河縣 城南為河心鋪南中鋪北為食饒鋪額設  
鋪司兵二十六名每年共支銀一百五十六兩

南和縣 城東為閻李鋪西為河頭郭鋪額設鋪司  
兵二十名每年共支銀一百二十兩

平鄉縣 城東北為夏莊鋪柴村鋪魏家鋪額設鋪  
司兵十六名每年共支銀九十六兩

廣宗縣 城西南為新建鋪北為栢社鋪西趙鋪額  
設鋪司兵十二名每年共支銀七十二兩

鉅鹿縣 城東南為清水道鋪西南為原莊鋪額設  
鋪司兵一十四名每年共支工食銀八十四兩

唐山縣 城南十五里為南樓鋪西南為范解鋪西  
北為太寧鋪北為楊村鋪額設鋪司兵十五名每  
年共支銀五十兩

內邱縣 城南為河村鋪小馬鋪都城鋪西陽鋪南  
宋鋪梁原鋪禦暴鋪北為李陽鋪史村鋪馬峰鋪  
張村鋪鎖鑰鋪額設鋪司兵四十名每年共支銀  
二百四十兩

任縣 城東為臺南鋪新店鋪北為橋頭鋪西為西

留鋪額設鋪司兵十六名每年共支銀九十六兩  
廣平府

共鋪司兵二百二十三名每年共支工食銀一千  
二百五十八兩三錢

永年縣 城東為曹莊鋪龐莊鋪高家寨鋪河莊鋪  
西關寨鋪張村鋪八汪鋪西蘇鋪賈葛口鋪額設  
鋪司兵五十四名每年共支銀三百二十四兩

曲周縣 額設鋪司兵十二名每年共支銀七十二



兩

肥鄉縣 城東為屯莊鋪南為焦家鋪西為劉家鋪  
北為林兒鋪額設鋪司兵二十四名每年共支銀  
一百四十四兩

雞澤縣 城南為六坊鋪新光鋪額設鋪司兵十名  
每年共支銀六十兩

廣平縣 城東為拳莊鋪額設鋪司兵八名每年共  
支銀四十八兩

邯鄲縣 城南為龐村鋪張村鋪北為劉莊鋪王化鋪額設鋪司兵三十名每年共支銀一百八十兩

成安縣 城東為郭坊鋪漳河鋪北為河疇鋪額設鋪司兵八名每年共支銀四十八兩

威縣 城東為孫家寨鋪西南為梨園頭鋪額設鋪司兵十名每年共支銀六十兩

清河縣 城南為史家塢鋪西南為李家莊鋪額設鋪司兵十八名每年共支銀六十兩又有淺鋪八

曰二哥營嚴家口吳家圈孫家口葡萄蓬草廟口  
黃家口賈家口

磁州 額設鋪司兵四十九名每年共支銀二百六  
十二兩零三錢八釐七毫

大名府

共鋪司兵一百四十四名每年共支工食銀八百  
六十四兩

元城縣 城東為岔道鋪東堤鋪高家莊鋪額設鋪

司兵十八名每年共支銀一百零八兩

大名縣 城西南為五里鋪段村鋪邊馬集鋪紫岡  
鋪大巖屯鋪西北為青頭鋪額設鋪司兵八名每  
年共支銀四十八兩

南樂縣 城東南為屯村鋪小屯村鋪夏莊鋪韓家  
集鋪千口村鋪大清集鋪方山谷村鋪邵郭鋪孟  
郭村鋪西為梁村鋪今移大名縣大巖屯西北為  
北張鋪北為翟村鋪今移魏縣康二莊額設鋪司

兵十八名每年共支銀一百零八兩

魏縣 城東為大寨鋪沙口鋪北為西寺堡鋪額設  
鋪司兵十五名每年共支銀九十兩

清豐縣 城南為舊城鋪潘生鋪宋固鋪北為王家  
莊鋪聶城鋪高家堡鋪孟固鋪額設鋪司兵十六  
名每年共支銀九十六兩

東明縣 城東為陸園鋪南為魚窩鋪柳園鋪雙井  
鋪杜勝鋪西為十里鋪東明鋪馬頭口鋪北為舊

寨舖司馬舖額設舖司兵二十名每年共支銀一百二十兩

開州 城西南為楊村舖東子岸舖西子岸舖西北為井店舖北為白倉舖額設舖司兵二十五名每年共支銀一百五十兩

長垣縣 城北為鄧岡舖教成舖中冉舖額設舖司兵二十四名每年共支銀一百四十四兩

宣化府

共鋪司兵一百四十八名每年共支工食銀八百九十四兩零八錢

宣化縣 城東南為賢字鋪思字鋪雨字鋪霖字鋪皆明景泰中置謂之暖鋪城西南為佐字鋪額設鋪司兵十四名每年共支銀八十四兩

赤城縣 城東北為致字鋪南為出字鋪西為恤字鋪禮字鋪東南為龍山所又南為陸字鋪嫺字鋪西北為任字鋪北為雲州堡友字鋪又堡南為孝

字舖額設舖司兵十名每年共支銀六十兩

萬全縣 城東南為至字舖理字舖城南為堂字舖  
知字舖俗字舖額設舖司兵十名每年共支銀六  
十兩

龍門縣 城東北為東方舖射字舖西為御字舖東  
為仁字舖東為鵬鶚堡舖南為行字舖數字舖堡  
北為文字舖東南為長安堡舖南為教字舖信字  
舖額設舖司兵十四名每年共支銀八十四兩



懷來縣 城東為城字鋪開字鋪中字鋪城西為一

字鋪臣字鋪額設鋪司兵二十二名每年共支銀

一百三十二兩

蔚州 額設鋪司兵十八名每年共支銀一百一十

九兩零六錢

蔚縣 額設鋪司兵十六名每年共支銀九十六兩

西寧縣 額設鋪司名十八名每年共支銀一百零

八兩

懷安縣 額設舖司兵十四名每年共支銀八十四

兩

延慶州 額設舖司兵八名每年共支銀四十三兩  
零二錢

保安州 城西為君字舖東北為洪字舖東為轉字  
舖氣字舖額設舖司兵四名每年共支銀二十四  
兩

易州

共鋪司兵八十六名每年共支工食銀五百一十六兩

本州 城東十里為麻屋鋪又十里為官橋鋪達涑水縣界東南十五里為北東鋪達定興縣界北城鋪南十五里為軍營鋪十里為明月鋪西十里為石門鋪十里為栢尖鋪十里為管頭鋪三十里為龍華鋪十七里為泥凹鋪十六里為上陳鋪十四里為三里鋪十四里為盤石鋪十五里為歪山鋪

十里為塔崖鋪達廣昌縣界額設鋪司兵六十名  
每年共支銀三百六十兩

涑水縣 城東為槐家莊鋪南為鄭家莊鋪西為道  
欄鋪額設鋪司兵十二名每年共支銀七十二兩  
廣昌縣 總鋪在上關有浮圖豐樂等一十五鋪共  
設鋪司兵十四名每年共支銀八十四兩

冀州

共鋪司兵一百一名每年共支工食銀六百零六

兩

本州 城東北為陸村鋪西南為宋家莊鋪曾家莊  
鋪安店鋪西為榆林鋪付水鋪西北為謝家莊鋪  
土路口鋪額設鋪司兵三十五名每年共支銀二  
百一十兩

南宮縣 城東南為岳悅村鋪田村鋪高村鋪孫村  
鋪狼塚鋪賈村鋪崔家寨鋪懸空鋪東北為耿家  
莊鋪西北為陳伯居鋪額設鋪司兵二十八名每

年共支銀一百六十八兩

新河縣 城東為小接頭鋪東南為閭莊鋪南馬莊  
鋪西為神首村鋪陳海莊鋪額設鋪司兵十名每  
年共支銀六十兩

棗強縣 城西為崔村鋪西北為蕭張鋪單馱鋪東  
為舊縣鋪額設鋪司兵八名每年共支銀四十八  
兩

武邑縣 城西南為劉中鋪額設鋪司兵八名每年

共支銀四十八兩

衡水縣 城西北為五花營鋪馬老店鋪額設鋪司  
兵十二名每年共支銀七十二兩

趙州

共鋪司兵一百二十二名每年共支工食銀七百  
三十二兩

本州 城東為西章鋪南為五里腰鋪封家鋪沙河  
鋪北為蘇村鋪周村鋪新寨鋪東南為西張鋪額

設舖司兵三十名每年共支銀一百八十兩

柏鄉縣 城南為駐駕舖小里舖西南為賈莊舖又  
南為營兒舖電冰舖營房舖北為程村舖又北為  
神顯舖故城舖口店舖額設舖司兵四十名每年  
共支銀二百四十兩

隆平縣 額設舖司兵五名每年共支銀三十兩

高邑縣 城東南為周村舖西為刑郭舖東北為江  
店舖又東北為小荆舖額設舖司兵十二名每年



共支銀七十二兩

臨城縣 城東為留村鋪鎮內鋪野狐鋪額設鋪司  
兵十名每年共支銀六十兩

寧晉縣 城東為干臺鋪東南為魚臺鋪東汪鋪新  
莊鋪西北為黃退鋪換馬店鋪額設鋪司兵二十  
五名每年共支銀一百五十兩

深州

共鋪司兵七十名每年共支工食銀四百二十兩

本州 城南為南魏村鋪陳二莊鋪西南為圈頭鋪  
西為和樂村鋪魏泊鋪額設鋪司兵二十名每年  
共支銀一百二十兩

武強縣 城北為孫家莊鋪南趙石鋪額設鋪司兵  
八名每年共支銀四十八兩城西有五里鋪今廢  
饒陽縣 城東南為段村鋪西為張平鋪東北為王  
家莊鋪孔店鋪額設鋪司兵十六名每年共支銀  
九十六兩

安平縣 城東為韓村鋪西為黃城鋪額設鋪司兵  
二十六名每年共支銀一百五十六兩

定州

共鋪司兵一百八名每年共支工食銀八百七十  
六兩

本州 城西南為八角郎鋪西為韓村鋪東北為清  
水河鋪額設鋪司兵六十名每年共支銀三百六  
十兩

曲陽縣 城東為趙邱鋪南為羊村鋪西北為孝墓  
鋪西為黃臺鋪額設鋪司兵四十名每年共支銀  
二百四十兩

深澤縣 城南為西河村鋪東北為張家莊鋪額設  
鋪司兵八名每年共支銀四十八兩

雍正二年兵部議准直隸為都會通衢夫役萬不可  
減額設之夫每於十名內召募八名留其二以為大  
差催募之用則夫役不至虧缺而供應亦無遲誤至

水驛與旱驛同例額設夫役亦難議減應於十分之內長養八名留其二分工食俟有大差經臨額夫不敷應付方許添僱若無差即行充餉雍正五年又議准各衙門驛站陋規永行禁絕直省額設工料約計四十八萬兩陋規四萬四千餘兩照各驛額設之數均減十分之一自五年為始節省歸公雍正十年又議准凡例在司庫請領者照實支九折之數核發例在地糧存留者亦照實數歸入起運項下報解自雍正

十一年為始永為定例

畿輔通志卷四十四

欽定四庫全書

畿輔通志卷四十五

河渠

尚書禹貢一篇紀夏后行水之功司馬遷因之為河渠書班固繼之志溝洫皆載一代疏排之績非如桑欽水經備敘川瀆源委也我

國家奠鼎燕京負崇山而襟滄海百川輻輳赴壑朝宗其間順逆通塞動關生民利病

聖祖仁皇帝臨御六十餘載地平天成而於畿甸河道堤防

尤勤

睿慮

巡行指授為斯民圖萬世之安我

皇上繼志續功大興水利

特頒內府金錢數百萬

命賢王董其事修濬兼施節宣備至以故水潤土甘年豐

人樂同符禹績非漢唐以來塞築補苴之能事也宜



為後世法程故於諸川之外特詳志焉

渤海 在天津縣東南一百二十里明統志東連遼  
海西抵直沽按直沽即今大沽口河流入海處也  
兩岸壁陡一闕中橫土人謂之海門潮汐所至北  
抵楊村南抵程官屯西過王慶坨率二百餘里皆  
淡水也鹹潮抵海門而止無全入者若天設之以  
限內外斯亦奇矣

海河 南北運淀河之會流也自天津東北三岔口

迄大沽口長一百二十里渙廣崖深奔流湍駛潮  
汐迎之則逆行而上禹貢所謂逆河是也每伏秋  
之交二運并漲淀水爭趨駢注於三岔一口而強  
潮牴牾洄漩不下倒漾橫流上游隄岸田廬皆受  
其浸所謂尾閭不暢胃腹俱病者也故欲治直隸  
之水者莫如擴達海之口而欲擴達海之口者莫  
如減入口之水雍正三年

上命怡賢親王興修水利

親授方畧於南北運各建壩開河減水分流別途歸海豈  
僅為運河計哉入口之水減則達海之口寬而北  
來之永定河南來之子牙河中間七十二清河乃  
得綽然入三岔口而東注朱子云治水先從低處  
下手正此意也

衛河 即南運河也亦曰永濟渠亦曰御河源出河  
南衛輝府自山東武城縣流入直隸故城縣界又  
東逕山東德州界復入直隸逕景州東吳橋縣西

又東北逕東光縣西又東北逕交河縣東南七里口又東北逕泊頭鎮入南皮縣界又東北逕滄州城西又東北逕青縣城東靜海縣城西天津府城北至三岔口與白河會入海計長八百餘里寰宇記永濟河在清池縣西三十里自南皮縣來入乾寧軍亦呼為御河金史地理志南皮東光吳橋有永濟渠按衛河本西漢時大河所經東漢以後為清漳二瀆所經隋時開為永濟渠宋皇祐初河合

永濟渠仍為大河所經南渡後大河南徙而衛河  
如故金元以來皆漕運所經也有減水河二一在  
滄州南十五里絕隄一在故興濟縣皆明弘治中  
開以備衛河泛溢久而堙塞閘石猶有存者雍正  
三年大水衛河溢決十三口 怡賢親王奉

上命查修水利奏開減水二河各建滾水石壩一座挑濬  
舊河分達海港滄青水勢藉以消洩居民賴之

按南運向苦淺滯故額設淺夫以供挑挖兩岸

隄工隨時補苴而已自漳河南徙於館陶入運  
湍急浩瀚每羨溢為灾雍正四年經 怡賢親  
王奏請分道專轄增汎員設歲修始以隄防為  
務乃隄日增高而水亦隨長伏秋汎漲各州縣  
往往於隄上加埧以防漫溢蓋以漳水泥濁河  
形曲折墊淤於下則泛溢於上勢固然也計惟  
於德州上流與古黃河相近之處度地建壩廣  
三四十丈引而注之古黃河不惟直隸河隄永

免漲溢卽德州一帶工程亦獲寧謐矣但地隸山東在此為切已之憂者在彼未免為秦越之視雍正八年七月德州第九屯隄決直隸景州以下十餘州縣禾稼盡沒水利衙門屢行咨會而決口訖未堅築蓋其地處上游水過正堪藝麥而此間形如仰釜有受無洩縱竭力修防隄工鞏固亦何救於田廬之湮沒耶若將臨清以北河道併歸直隸總河管轄則一河首尾修濬

自如上下不致阻格矣

白河 即北運河也亦曰潞河方輿紀要白河源出  
宣化府龍門縣東滴水崖東流入密雲縣之石塘  
嶺過縣西入通州界其支流亦從石塘嶺過懷柔  
縣西順義縣東入通州東境合焉東南徑郭縣武  
清縣東而入直沽合衛河入海又白河徑靈蹟山  
黃花鎮川河入焉又南徑牛欄山東麓潮河流合  
焉又南逕順義縣東門外順義縣志白河發源塞



外自石塘嶺白馬關入故曰白河赴通州北關與  
溫榆河合即運糧河性悍多沙遷徙無常俗稱為  
自在河明神宗實錄萬歷三十一年從工部議挑  
通州至天津白河深四尺五寸所挑沙土即築隄  
兩岸著為令漕河圖志燕趙之間地方千里其間  
巨細河流悉至武清縣丁字沽注於白河故一遇  
雨潦白河滿溢要兒渡口南蔡村等處衝決隄岸  
壞民田廬起夫塞築勞費萬計逮時乾旱舟行又

或淺阻以此知水勢盈涸不常不可以經久而論也按白河會潮沽榆沙通惠諸河之水源高勢峻有如建瓴而西北諸山泉流滙聚每伏秋之際積雨未歇怒流已至頃刻尋丈非徒恃隄防所能捍禦也康熙三十八年決武清縣筐兒港三十九年

聖祖仁皇帝親臨視閱

命員外牛鈕等於冲決處建減水石壩二十丈開挖引河夾以長隄而注之塌河淀由賈家沽道洩入海河楊

村上下百餘里河平隄固有

御製碑文誌其事康熙五十年以河西務工程險要

親臨指授命牛鈕開挖引河復以河西務城東有舊河形對  
新河下口至三里屯長四百餘丈

特命開直河一道次年工成於是新河之溜移流於西而東  
岸大隄之汕刷以免要兒渡之衝險無虞矣雍正  
三年大水隄岸埽壩多有衝潰四年經 怡賢親  
王奏請北運河一切工程歸通水道統轄河西務

設同知一員楊村設通判一員分界管理增置縣丞主簿等官以專防修五年河水泛溢東西岸漫決者四六年 怡賢親王奏拓筐兒港舊壩濶六十丈展挖引河改築長隄七年疏濬賈家沽道分減既多消洩亦暢故壩門以下河水安流而河西務一帶距壩稍遠山水暴至遂復漫決上塵

聖懷發帑遴員授之方畧於河西務上流之青龍灣建壩四十丈開引河而注之七里海仍展挖寧車沽河

導七里海水而洩之北塘口上下分消區畫盡善  
運道民生均獲寧謐而所費帑金已不下六十餘  
萬矣

淀河 在天津縣北五里永定子牙清河之會流也  
自河頭至丁字沽入北運河長四十里淀水浩淼  
至此始有崖岸故名河頭

東淀 延袤霸州文安大城武清東安靜海之境東  
西亘一百六十餘里南北二三十里及六七十

不等蓋七十二清河之所匯潴也永定河自西北來子牙河自西南來咸入之

永定河 亦曰盧溝河亦曰渾河亦曰桑乾河永定之名

聖祖仁皇帝所命也明外史河渠誌桑乾河發源太原之天池伏流至朔州馬邑雷山之陽有金龍池者渾泉溢出是為桑乾東下大同古定橋抵宣府保安州雁門雲中應州諸水皆會穿西山入宛平界東南

至看丹口分為二其一東由通州高麗莊入白河  
其一南流霸州合易水至天津丁字沽入漕河是  
河過懷來兩山間不得肆至都城西四十里石  
徑山之東地平土疏衝激震蕩遷徙非常元史名  
曰小黃河以其流濁也金史禮志大定十九年有  
司言盧溝河水勢泛溢齧民田乞官為封冊神號  
特封安平侯建廟河渠志大定二十七年宰臣以  
孟家山金口閘視都城高一百四十餘尺倘遇暴

漲其害匪細若固塞之則所灌稻田俱為陸地種植禾麥亦非曠土上是其言遣使塞之二十九年以涉者病河流湍急詔命造舟既而更命建石橋明昌三年三月成勅命名曰廣利即今之盧溝橋也元史郭守敬傳至元二年授都水少監言金時自燕京之西麻峪村分盧溝一支東流穿西山而出是為金口其水自金口以東燕京以北灌田若干頃其利不可勝計今若按視故蹟使水得流通



上可以致西山之利下可以廣京師之漕又言當  
於金口西預開減水河西南還大河令其深廣以  
防漲水突入之患帝善之明宣宗實錄戶部侍郎  
王佐言通州至河西務河道淺漕船動以千計兼  
四方商旅舟楫往來無港汊可泊張家灣西舊有  
渾河若加疏濬近京一二十里更使充廣潞為巨  
浸令可泊舡公私兩便上命都督馮斌等審視七  
年冬斌等以圖進上以其役重大姑止固安縣志

桑乾河自盧溝下流入縣境明嘉靖初徙縣北十餘里東流至縣東紀家莊北分為二萬歷中又徙縣西十餘里東南流逕黃垓之北而東南入霸州界尋又徙縣南城隄下後復徙北

本朝順治十一年由縣西宮村與清水合流而南入新城界永清縣志明萬歷三年撫臣王一鶚修築河隄延袤五十餘里障水東流三十三年復抵縣界直逼城垣

本朝順治八年徙固安迤西幾七十里與白溝河合流  
霸州志明正德初在州南門外嘉靖中徙州城北  
後徙固安北十里鋪其支流則自半壁店李家口  
統州東北境由鋪疖疸白墳採木營達信安

本朝順治中每決於固安之叵羅堡由州治西城北東  
入清河後更決於新城之九花臺南里諸口而州  
城之西南竟成巨河矣康熙戊辰仍從善來營入  
玉帶河俗謂之霸州河按盧溝亦曰黑水河水色

最濁其急如箭東決則西淤倏忽遷改前人謂之  
無定河自元歷明冲蓄奔潰屢修屢決迄無寧歲  
康熙三十七年三月我

聖祖仁皇帝軫念郊圻親臨視閱命撫臣于成龍大築隄堰  
疏濬兼施自宛平之盧溝橋至永清之朱家莊漚  
狼城河注西沽以達於海延袤二百餘里廣十五  
丈五月工告成

賜名永定河

勅建河神廟

御製碑文以記之自是湍水軌道橫流以寧三十年來河無  
遷徙此從古所未有也惟是下流入淀之後水渙  
泥停積漸闡淤蒙

聖祖諭旨屢下毋令壅礙清流而該管分司衙門唯事修防  
不加疏導淤而南信安勝涉等淀變為高原復淤  
而北策城新張諸泊墊為平陸駸駸乎及於台頭  
與子牙河會壅闡清流幾無達津之路矣雍正三

年 怡賢親王奉

命查修水利

上諭令引渾河別由一道入河毋使令入淀大哉

王言已攬河道全局而居其要矣蓋淀泊之用有翕受之功亦有停蓄之利衆流競趨滙為巨澤容與蕩漾有以緩其奔突之勢然後安流弭節而去則其衝易受而其患易禦正定順德廣平之有南北二泊猶順天保定河間之有東西二淀皆天地造設自

然之妙納衆流而節宣之不使之一往衝突而不  
可禦也西淀之水會為一河分為三汊而匯於東  
淀南泊之水注於北泊北泊之水出滏陽之道合  
滹沱之流亦由子牙一河歸於東淀則東淀一區  
所以蓄直隸全局之水游衍而節宣之乃永定濁  
流闌淤梗噎於其間則上流之汜濫者將安歸乎  
怡賢親王欽遵

諭旨於郭家務改河東行復開下流之長洵河引逕三角

淀而注之河頭與清河會周築三角淀圍隄以防  
其北軼又以河性善淤奏明逐年挖淺俾河流不  
致遷徙籌畫可謂盡善而河官錮習不利於挖淺  
而利於築隄改河之後隄日增高而河亦與之俱  
長長洶河淤塞絕流三角淀所餘無幾於是散漫  
南行頭道河二道河皆成斷港剩有楊家一河若  
經汎之後再淤而南則清水無路歸津側注於楊  
柳青一帶而濁流復從而迸注之其不至穿運而



過者幾希此目前之大患全局之深病也為今之計唯疏它長洵導之東注河頭南岸接築長隄至楊家河而止雖不能必其不再淤而旋淤旋它亦亦可暫為補救矣

按永定濁泥善肥苗稼凡所淤處變瘠為沃其收數倍涇水之富關中漳水之富鄴下不是過也河所經由兩岸窪鹹之地甚多若相其高下開濬長渠如懷來保安石徑山引灌之法分道

澆溉則斥鹵變為肥饒而分水之道既多則奔騰之勢自減從高而下自近而遠一河之潤可及十餘州縣此亦轉害為利之一奇也唯在任事者不避勞怨持議者不惑浮言則鄭國史起之功安在不復見於今日乎

清河 即淀池之經流也其派有三分自會同河之三汊口徑台山而北出紀家淀而東入勝涉河者此西派也由趙家房徑托蓮泊出郭家窪會勝涉

河者此東派也由下馬頭徑崔家房入張家嘴過  
任家莊逕左家莊泊歸石溝河者此南派也沿大  
隄而東徑西馬頭堂頭左家莊會石溝河則其支  
流也勝涉石溝二河總歸臺頭一河經羊糞港而  
出楊家河楊家河至三汊口計長一百四十里自  
永定下流入淀勝涉河淤而東西二派無下口張  
家嘴淤而南派無正流唯沿隄一支寬不過二三  
丈深不過五六尺何以容西來決潏無涯之巨浸

乎雍正三年自崔家房以東決隄九處各數十丈  
文安城郭宛在水中 怡賢親王奉

命查修水利開勝涉河十七里而東西二派下口遂通它  
張家嘴河五里而沿隄一支分流北注又於上流  
疏濬中亭河四十餘里自口頭對岸之下河門分  
引玉帶河水入臺山河其下流石溝臺頭淤淺之  
處槩行撈挖數載以來清流湍駛隄防晏如霸保  
文大之間禾黍豐而粳稻熟民享樂利皆

聖主勤恤之德 賢王治淀之功也

按以上諸河經由泊港菰蘆叢生芡草密布壅溜  
停汎易致淤淺淺阻之後舟楫不行復成斷塞  
雖分隸河道統轄而該管汎員唯知保守隄工  
至於淀之通塞河之淤暢俱在茫茫積浸中為  
考成所不及誰復過而問之殊不知淀河一塞  
分消無路西來之水并注隄下一遇積雨暴漲  
頃刻尋丈雖有人力將安所施故防隄而不濬

河非計也今中亭河苦淺趙家房河苦淤張家  
嘴未達於淀泊沿隄一河自堂頭以下至壩嘴  
頭亦苦淺石溝通勝涉一河苦隘勝涉至臺頭  
一河苦淺計其丈里非水涸時興大工隨宜疏  
濬不可

會同河 一統志在霸州南十三里又名苑口河本  
玉帶河也自保定縣流入州界又東北曲折行可  
十里為善來營北岸有渾河口又東可五里為苑

家口又東五里為蘓家橋河流至此分為三道即所謂三汊口也冊說玉帶河至本州境會渾河東下名會同河分二支俱流經文安縣境散入石城等淀本河正派至州東無梁閣名邊家河又分一支入永清縣界名信安河其正流曲折而東入文爾諸淀又東逕東安縣界為呂公河按會同為玉帶之下流出自西淀之茅兒灣至霸州而拒馬桑乾胡良霸水皆會焉故名會同河今諸河俱已改

流唯栲栳圈一河南北相望即中亭河也首尾皆  
淤斷而會同河身寬不逾二十丈或十五六丈總  
會順天保定正定三府西山一帶三十餘河之水  
勢不能容則蕩擊為暴決何家道口決鹿疇決下  
武各莊決保定縣幾無虛歲雍正五年中亭河開  
通分流北去玉帶之水十減二三但河身本淺於  
正流而新開之牡牛河自西栲栳圈會入挾擁泥  
沙復加闢淤則浚治之工有不可一日緩者其會



全下流之信安河已成陸地即勝涉至辛張逕褚  
沽東沽二港達王慶之一支名呂公河者亦無河  
形唯餘臺頭一派為正流則上自石溝下至楊家  
河通塞淤暢所關甚鉅此河道全局之利害也

中亭河 亦名新挑河一統志在霸州南八里綿亘  
數十里按此即古中亭河也亦曰拷棧園河康熙  
三十八年

聖祖命河臣王新命開挑上接十望河下入臺山河分減玉

帶河水勢發帑築隄上下各六工上六工距河稍遠以護州治下六工縷河為隄以護田廬增設州判一員管理每歲按里出夫隨時修補後渾河淤至勝涉下流遂塞而十望河自張青口來者為白溝流沙墊淤上流亦斷自是隄工殘廢而下六工無復遺址與積淀相連雍正三年 怡賢親王奏開中亭十望二河四年中亭河工竣十望河以積水未開五年大水難以興工遂罷十望之役自口

頭對岸之下河門挑引河一道分玉帶河水而注之中亭河增設吏目一員分汛防修七年州判陳起唐捐貲修築下六工隄長四十里

西淀 跨雄新數邑之境既廣且深西北諸山之水皆匯焉北自雄縣來者曰白溝河拒馬之下流也拒馬發源易州廣昌之涑山至房山鐵鎖崖分為二派一派東入涿州過新城而南挾河琉璃河廣陽鹽溝諸水白玉塘西域寺甘池諸泉皆入之一

派南入涑水經定興而東易州之濡水武水白楊  
虎眼梁村馬跑諸泉及道欄河女思澗子莊溪諸  
水俱來會之二派合流為白溝河入柴伙淀西自  
安州來者曰依城河曹河徐河一畝鷄距方順龍  
泉諸水之所會也徐水出五迴嶺經滿城至安肅  
而曹水會焉一畝泉出滿城東南餘小泉以百數  
鷄距紅花名最著流經清苑城南至糧河橋而方  
順水來會之方順即曲逆河祁水之下流也五雲

石臼二泉流為放水河五郎河入焉流逕石橋村  
至糧河橋與一畝泉會流逕新橋而滿城之龍泉  
河自南來入之至善馬廟與徐河合流為依城河  
入雜淀西北自安肅來者曰電河源出石獸崗灌  
河入之由新安之黑龍口歸雜淀新安三面皆水  
唯城北為乾土而地處容城下流雨潦南下則大  
潏淀一帶盡為鄰壑墟里蕭條最稱貧瘠雍正三  
年 怡賢親王奏請於三台村開引電河逕小王

營尚村之北至南河頭入燒車淀南岸築隄建閘以裨節宣隄內大潏淀數百頃皆引流種稻屢獲豐收澤國已成樂土矣南自高陽來者曰豬龍河唐沙滋三水之所會也唐河原名潏水源自山西靈邱入唐縣為唐河橫水自西北來會居民引以溉稻直達下素町畦相望經曲陽之鎮里高門所溉尤多南入定州而白龍泉復來會之王謙王耨等村傍河皆圩岸也沙河來自山西之繁峙入曲

陽界合平陽河南流阜平之當城臙脂二河行唐  
之郛河咸會焉其上流亦名派水經新樂歷定州  
沿流多資灌溉滋河發源山西之枚回山經靈壽  
為慈水七祖寨岔頭大明川壅流可田入行唐之  
張茂村伏焉至無極南孟社而復出遼縣北旋經  
深澤之龍泉固沃仁橋疏流成渠皆天然水利也  
三水頗稱鉅流畢會於祁州之三岔口為豬龍河  
逕博野蠡縣高陽而入白洋淀豬龍河水性湍急

奔騰最難捍禦雍正三年決柴淀口而東潰蟬  
螂口古隄直衝鄭州驛路十里浸為巨澤 怡賢  
親王親歷相度疏通豬龍故道決口始塞驛路復  
通然下流歸淀之處河道紆迴停沙壅溜易致橫  
決復令清河道王紘於出岸村開挖引河十里至  
孟仲峯出口東岸築二壩以防其軼西岸截沙嘴  
以順其流然後安流入淀又於放水口斜築長  
隄以禦倒漾蟬螂口殘隄數十里亦一例加修



以為重障於是豬龍順軌瀕河田疇比年豐稔但  
自祈州以下岸土挾沙最易坍塌岸坍塌則隄無所  
附宜於頂溜掃灣建築挑水迎水等壩護岸以固  
隄根其下口歸淀之處近有淤沙漲起抵闕河流  
亦宜開挖以順水勢

趙北口 居西淀之中舊有石橋八座白洋諸淀之  
水皆由橋下東流實西淀之咽喉也而石橋卑隘  
礙流雍正三年 怡賢親王奏請易之以木升高

加濶又增建三橋俾積淀之水暢然東注但白溝  
濁水自北而下出河門而橫截清流至樂王行宮  
前河形拗折土人謂之鷺頸所謂咽喉已通而胸  
膈未利也雍正四年委員挑挖經汎而其淤如故  
蓋白溝漲時近自諸山而下推擁泥沙所至填淤  
四十里之柴伙淀變為桑田者什三四矣不加浚  
治則西來諸水泛溢無歸若歲歲滯挖是勞費無  
已時也渾流入淀其害往往而然欲為一勞永逸

之計必不使之入淀而後可查白溝故道行於淀外  
自龍灣而東逕道務馬務頭洪城出張青口河形  
宛然宜疏濬深通導白溝之流復於故道塞其入  
淀之口然後將河門淺阻驚顛拗折之處盡行挑  
挖如此則清濁分流淀清而河亦暢矣

子牙河 在大城縣東亦名沿河大城縣志沿河自  
河間縣之龍華橋轉入縣西南二十五里之馬村  
東北流徑十里灣自南而東徑白洋渡四呈口至

縣東二十五里匯黑龍港河亦名交河從而北折  
繞縣東十二里趙扶村又北徑子牙村故名子牙  
河亦名鹽河冊說鹽河在縣南十里自河間流入  
分二支一西北流入文安縣石城淀一北流又分  
三支西一支入文安黑母淀東一支入大小窩口  
中一支入霸州文爾淀匯於武清縣三角淀入白  
河按子牙河總會南北二泊滏漳諸水終以滹沱  
為經流其湍悍迅激渾濁衝墊性與餘河異水經

所云右出為澱北為濊口者是也伏秋汎發奔騰  
湧溢河間以北靜海以南皆被其害康熙三十九  
年

聖祖仁皇帝親閱河工

特授方畧

頒發帑金於獻縣河間東西兩岸高築長隄西接大城東接  
青縣靜海各二百餘里又於廣福樓之焦家口開  
新河一道東北至賈口入淀特設分公司一員董其

事令河間府同知分轄增置縣丞主簿等官專汛  
防修自是河大青靜之民始有寧宇矣嗣後雍正  
三年分司不得其人河員怠於其職隄多潰決  
怡賢親王奏准動帑修築又奏請撤回分司歸天  
津河道統轄

按子牙河至王家口入淀之處分為二派一派  
西流徑文安土橋村至趙家莊又分二支西支  
抵文安大隄而北至龍塘灣北支徑三灘里至

張官營抵石溝河往往橫截清流兼為隄防害  
一派東北流徑瓦子頭斷隄村岳莊莊頭村過  
王家泊抵台頭會清河而東雍正三年經 怡  
賢親王奏請障其西流約束歸一四年令清河  
道王紘相度工費及汎水過後西支自淤正流  
俱由瓦子頭一支而莊頭村南舊有私河一道東  
由陳家泊歸獨流大坑急溜衝刷遂通舟楫此  
亦水自遂其東下之性非人力所為然順而導

之再加疏濬俾全河之勢盡歸大坑則台頭一  
河無復渾濁之擾清水可以暢流矣再子牙河  
新河入淀之處東西相距二十餘里兩河之隄  
南連而北缺兩隄之間村落數十地皆肥美但  
北面無隄每遇二河漲溢淀水倒漾則數十村  
落皆在水中而河員猶守兩隄唯謹幸獲無虞  
則自以為功此如防盜者守牆垣而開後戶盜  
入胠篋發匱而去垣牆守者猶巡警徹夜此何



為者也故北面之隄斷宜接築查王家口村南  
東岸有古河一道名三家淀河緣東隄出瓦子  
頭橋下迤邐東北與新河合而入淀雖已淤淺  
河形宛然若挑挖深通亦可分正流之漲挑河  
之上即用以築隄補缺成圍圍內之地分別高  
下疏列溝塍於西南建閘引溉東北洩而出之  
一舉而河隄兩成營田亦就矣再查新河形勢  
由西南而趨東北從高就下直注獨流大坑甚

為徑捷但河身淺狹隄岸殘缺若深濬而堅築之於焦家口分流之處建挑水壩逼子牙之溜移入新河刮刷愈深則王家口以上無羨溢之虞即台頭一帶亦免墊淤之患矣

千里長隄起清苑縣界訖獻縣之臧家橋週迴於順天保定河間三府之境長千有餘里沿河繞淀為數十州縣生民之保障康熙三十五年大水多漫決坍塌我

聖祖軫念郊圻頒發帑金

命河臣王新命徧行查勘一例加修增設縣丞主簿等官管理隄固河平民享樂利者二十餘載雍正三年大水漫決尤甚存者亦大半殘缺四年

上命怡賢親王委員領帑畫地修築加厚增高統於是秋告竣奏隸河道統轄董理責成工程日以堅固迄今六載高下豐稔瀕河近淀州縣井閭皆歌樂土焉

滹沱河 源出山西代州繁峙縣太戲山流經太原

孟縣北始入直隸平山縣北又東逕靈壽縣南入

正定縣界周禮職方氏并州川滹池戰國策趙攻

中山以擅滹沱漢書郡國志蒲吾註永平十年作

常山滹沱河蒲吾渠通漕隋圖經魏改為清寧河

唐書五行志永淳二年八月恒州滹沱河及山水

暴溢害稼開成元年七月鎮州滹沱河溢害稼隄

防考宋天聖間曹馬口隄壞尋復修築金史河渠

志潯沱河大定八年犯正定命發民夫繕完隄岸  
元史河渠志延祐七年正定路言正定縣潯沱河  
北決隄寢近城每歲修築聞其源本微與冶河不  
相通後二水合其勢遂猛唯闢冶河自作一流潯  
沱水十退三四正定府志明成化八年由正定出  
晉州紫城口南入寧晉泊正德十三年紫城口淤  
塞淺漫分為二股一股仍由寧晉泊一股東溢由  
束鹿鴉兒河入深州界遣夫於涅槃集迤東修築

隄岸障東溢之水歸寧晉故道工甫畢而秋水漲將南流仍併東行入東鹿界嘉靖十一年遣太僕卿何棟相視回奏晉州地形西高東下水性就下遂失故道議於藁城張村起至晉州故壩止厚築長隄障歸故道不果其後徑州南關外

本朝順治十三年又南徙由藁城南彭村徑晉州周頭村北釣魚臺龐家莊胡士莊寨入東鹿百尺口橋至冀州歸清水河並行按滹沱水急流濁所至填

淤自入寧晉泊滄澧水道俱受其壅塞雍正三年  
東徙決周頭村直衝東鹿環城而流瀾漫四野四  
年 怡賢親王奉

命查勘束邑官民籲請障歸故道仍入寧晉泊 賢王以  
泊乃三郡河流匯歸之地有翕受節宣之功豈可  
復聽濁流淤塞致衆水無歸漲溢為害乃親行相  
度得舊河一道由木邱南至焦罔入滄河委員自  
第四溝開挖一路疏濬深通於周頭築壩障其東

下而導之南流自是束深無衝潰之虞泊水免淤塞之患矣

按滹沱之在山西本非鉅川至平山合治河而始大治河一名甘陶河源自山西平定州之松嶺流至平山初不與滹水相通元初鑿而合之其勢遂猛延祐間引闢治河害已減半後治河下流漸塞復入滹沱歲有潰決之患皇慶中議復之而未果 怡賢親王於敬陳畿輔西南水



利情形疏內奏請塞治河入滹之路循其故流  
加以挖濬引入汶河誠為一勞永逸之計

滏陽河 亦名滏水源出磁州神農山東北流經邯  
鄲縣東三里會渚沁二水冊說渚河又名塔水在  
邯鄲縣南五里發源紫山徑城西南入滏陽河沁  
河在邯鄲西一里發源紫山徑城西入滏陽河案  
宇記滏陽縣滏水源出縣西北鼓山南巖下泉源  
奮涌若釜之揚湯故以滏口名之其水冬溫夏冷

元史郭守敬傳守敬面陳水利四事其四磁州東北滏漳二水合流處引水由滏陽邯鄲洺州永年下經雞澤合入滏河可灌田三千餘頃明外史河渠志滏陽河舊在任縣新店村東北源出磁州徑永年曲周平鄉至穆家口會百泉等河北流明永樂間漳河決而與合二水每並為患至景泰間又合漳衝曲周諸縣沿河之地皆築隄備之成化間舊河淤衝新店西南為新河合沙洛等河入穆家

口亦築隄備之一統志舊滏河在鷄澤縣西自永年通水閘北流經此又北達平鄉縣入寧晉泊舊道紆曲不能容常潰決為民患

本朝康熙七年知縣姜照挑濬新河以導其流自馮鄭村至亭白頭長二里許六方等村永無水害按滏陽河舊合漳流故多衝溢今漳水東徙經魏縣元城抵館陶入衛不與滏合滏水獨行貫寧晉泊而出至衡水縣界滹沱河出焦岡合流徑冀州武強

獻縣河間青縣大城入淀名子牙河其支流自完  
固口徑杜林鎮抵青縣之鮑家嘴入南運河近已  
淤淺唯子牙一支為巨津焉自寧晉泊以上滏水  
所經州縣多引流種稻沿河閘座甚多而磁州之  
民欲專水利以致下流稻田多廢爭訟累歲不休  
雍正四年 怡賢親王奏稱查廣平府舊志磁州  
屬廣平路領成安今成安現隸廣平則磁州本非  
豫屬明矣請將磁州改歸廣平府則滏陽一河全

由直隸統轄均水息爭同安樂利矣奉

旨怡親王奏請將磁州改歸廣平府管轄以收滏陽水利  
稽考誌書相度地勢援古証今俱為符協似於廣郡一  
帶民田大有裨益著九卿會議具奏嗣經戶部議覆應  
如所請行自是廣平以下均沾河潤各州縣營田  
多至二千餘頃從前斥鹵盡為稻鄉矣

按滏河隄岸例係瀕河村莊修築工多力寡難  
免潰決應照千里長隄之例將該州縣所有隄

工丈尺查明按通邑里甲攤派均修造冊存案  
永著為令工少人多自成鞏固矣出泊以下水  
勢倍增會以滹沱湍悍之流所有民堰難資捍  
禦雍正八年衡水隄決溢流直犯青縣可為寒  
心應將臧家橋以上直至衡冀一帶民堰令地  
方官查估動帑增修工竣仍照千里長隄例令  
民間年年修補

寧晉泊 一名胡盧河在寧晉縣東南自隆平縣流

入又東北入冀州界宋史河渠志熙寧八年發夫  
增治胡盧河舊志在縣東南二十里東西徑三十  
里其上流即漳水與滏水合流滙大小羣川注此  
土人稱為寧晉泊即北泊也洩河治河沙河涕河  
槐河午河李陽河七里河滏陽河咸入焉自滹沱  
河南徙由賈口而入淤塞滏河故道三十餘里水  
無所洩遂衝決洩口營上等村而東注水口河身  
亦多淺濫雍正三年滹沱東徙不復入泊四年

怡賢親王奏請開挖自黃兒營至營上村一路展寬濬深泊水始得暢洩

大陸澤 一名廣阿澤在任縣土人謂之張家泊元和志大陸澤一名鉅鹿在縣西北五里東西二十里南北三十里葭蘆菱蓮魚蟹之類充牣其中即南泊也百泉牛尾野澧沙洛劉累程二寨聖水順水蔡馬柳林等河咸入焉北有穆家口河洩之於北泊東有雞爪張滋等五溝洩之於滏河縣志弘



治時涵水洶渚九河舉發衝決隄防下流隆平縣  
淤窒壅塞者四十餘里隆平鉅鹿均被其害而任  
縣居多嘉靖六年發正定順德二府夫役同浚之  
自穆家口至羊毛圪塔四十里深廣各丈餘水得  
其性隆鉅復膏壤而任之水患亦息

本朝順治十八年重濬日久堙塞而五溝亦淤其三祇  
有雞爪張滋不絕如縷有所受而無所洩伏秋漲  
溢為瀕澤居民田廬害雍正四年 怡賢親王奉

命查勘委員開穆家口河長四十里挑河之土即以夾築  
長隄導澤水而注之北泊其雖小等溝亦加疏濬  
於是水患既除水利亦興邢家灣南邊家莊北引  
流種稻營田數百頃

按南北二泊正定廣平順德三府之水會也西  
帶重山二十餘河之水建瓴而下每遇伏秋之  
際千巖飛雨萬壑懸流若無二泊為之翕受而  
節宣之其奔衝橫溢為何如哉故南之有南北

二泊猶北之有東西兩淀皆治水者所當加之  
意也滹水嘗入北泊塞河口而環泊州縣受漲  
溢之害者多年漳河合滏潏入南泊而穆家雞  
小等河塞遂致中滿旁溢任隆之民坐受其浸  
今年滹漳遠徙賢王施疏濬之功州郡享平  
成之利此千載一時也然二水之故瀆尚存濁  
流之遷徙靡定既可以不法而去詎難於不引  
而來且前明之世有障滹汜而歸寧晉以為故

道者矣有請濬穆家口仍俾漳滏會流者矣或  
暫免一方之害或微規目前之利而不知統計  
全局之利害其貽患不僅在一時也故謹著之  
又按入泊諸水自汶澧百泉牛尾聖水等河恒  
流不竭外其餘春夏每多枯涸然前人載之圖  
誌設有橋座蓋以為攝水歸泊之道也雨集山  
漲由此脈分縷析而注之大泊之中田間無宿  
潦焉其為功也大矣有司不知浚治或反聽民

佔耕一旦山水暴來則奔騰四野為田疇害雍  
正四年 怡賢親王奏明委員查勘酌量疏通  
五年復檄行各地方官隨宜濬治毋得聽其堙  
塞而有司具文視之不知奉行八年秋雨多水  
溢環泊十餘州縣皆罹其災上厪

聖懷遣官發帑徧行賑濟既過之後官民晏然又復不以  
為事昔陸隴其為靈壽令令民挖濬衛河其始  
頗有怨言以為開無水之河徒勞民力隴其不

顧卒成之已而霖雨水大至賴此河宣洩遂以  
有秋至今民猶懷之此賢達之遠見也 怡賢  
親王於通州武清地方開挖鳳河於香河寶坻  
地方開挖窩頭鮑邱二河於良鄉涿州固安霸  
州地方開挖牯牛河收攝野潦俾有所歸數載  
以來民享其利

鳳河 名勝志鳳河水一渠從西流至鳳窩村雖隆  
冬沍寒水亦不冰東安縣志在縣東北四十里鳳

窩村其水自縣西北草橋來又南流過縣之漂流淀又南入武清三角淀其形如鳳此鳳河所由名也按鳳河之源在

南苑中流出東南隅自迴城而東涓涓一帶東南流至武清之堦上村河身深廣以下填淤斷續一遇伏秋雨潦散漫無歸雍正四年 怡賢親王奉

命查修水利欲加疏濬而來源微細不足以爲恒流查有凉水河一道發源水頭莊貫

南苑出弘仁橋東流至高各莊東北流抵張灣入運  
乃奏請於高各莊分流南引至堽上入鳳河故道  
一路挑挖過雙口抵青沽港入淀河仍於分流之  
處各建一閘水小則閉東閘啟南閘流入鳳河水  
大則閉南閘啟東閘洩入運河次年河成宛平灤  
縣武清東安一帶積潦盡消桐林牛鎮三間房等  
處開渠引水各營田數十頃唯閘座未建每年築  
壩蓄流以資灌溉



牯牛河 在良鄉縣東南鹽溝廣陽二河之會流也  
鹽溝源出宛平縣龍門口東南經縣東南陶村即  
古福祿水也水經注聖水又東廣陽水注之水出  
小廣陽西山東逕廣陽故城北又東福祿水注焉  
水出西山東南流逕廣陽故城南東入廣陽水按  
鹽溝廣陽二水至良鄉縣城東南合流為三义口  
南流至任邨西南入大清河一遇伏秋水漲發  
奔騰衝突故土人謂之牯牛河良涿固霸之間累

被其害雍正四年 怡賢親王奏請於任邾之南  
開挑新河東南逕涿州界東逕固安縣西北循盧  
溝河故道南徑霸州之南孟等邾東南抵西拷棧  
圈入中亭河長二百餘里自是奔突患息野潦有  
歸四州縣秋禾皆獲豐稔

窩頭河 即蒼頭河一統志在香河縣西北二十里  
上通牛欄山水窩頭莊水下通三路隄口一由李  
家園坑隄口入北吳村一由明星堂坨口入甘十

八堤口一由東凌莊尹家河沙務莊張家灰店南  
吳村牛家屯入板罾口運河按此河水本無源伏  
秋汎發衆流會於窩頭徑香河縣百家灣東與渠  
水合流東逕七里莊入寶坻縣界東過城南之西  
石橋至王補莊與鮑邱河會

鮑邱河 源出密雲北山徑三河縣之夏店東南逕  
虎將莊入寶坻縣界東逕縣北齊河務蕭家壩東  
南至王補莊與窩頭河會過林亭口張家莊至周

家莊東南逕尹家莊又東由八門城入薊運河

按二河原無恒流上受通州三河雨潦之水泛  
溢而下下流淤塞斷續無路消洩香河首受其  
浸而寶坻地形如釜一遭淹沒經年不涸為害  
尤劇雍正四年 怡賢親王親歷相度奏請疏  
通窩頭河自百家灣起鮑邱河自魚樁起分道  
挑挖或循舊流或取直逕遶縣之南北皆會於  
王補莊其八門城出口河身淺窄紆曲乃自林

亭口別開直河一道至尹家莊寬江入薊運河  
寬深暢利數年以來香寶田疇高下皆稔無氾  
溢之患矣此外古河故瀆所在多有與鳳河近  
者有古龍河與南運河近者有古漳河阜城交  
河之境有古清河與滏河近者有滹沱故道深  
冀等州衛武等縣皆有之又武強縣有龍治河  
衡水縣有古鹽河東強縣有黃瀘河清豐南樂  
等縣有馬頰朱龍二河其他不及悉載此等古

河雖無來源皆堪行水而沿河小民貪圖微利  
往往占耕為業或地處下流曲防攔截以致脈  
絡不通一旦雨水聚滙則橫溢而出其受其浸  
夫王政之大者莫如盡力溝洫直隸沃野千里  
川流百道而霖雨偶多則平陸行舟此無溝洫  
之故也 賢王開疏四河以著明效因以風示  
有位欲其則倣奉行凡各屬所有古蹟舊港因  
勢乘便酌量開通其過溝洫遠矣近泊者導之

入泊近河者導之入河近淀者導之入淀委曲  
貫通流而不窒則潦水各有所歸何至瀰漫為  
害留心民瘼者幸加之意焉

京東諸水不於天津歸海故自別為一局其經流之  
大者莫如灤餘若石河湯河洋河潮河清水河陡  
河皆獨行赴海其他枝津別派附巨川而朝宗者  
數十百道詳已見於山川矣不復具列取其曾經  
修濬有關民生利病者著於篇

薊運河 一名潮河乃沙河沽河洵河林河黃頌諸水之會流也寶坻縣志潮河在縣東二十里自三河縣流入至縣東北三岔口與洵河及薊州之沽河會流曰運糧河一名白龍港又東南至縣東九十里名豐臺河亦名懷襄河共南流過梁城所蘆臺抵北塘口入海又考薊運河源出遷安縣三台營會遵化諸山泉之水俗名沙河逕遵化州城南西南流至張七各莊折向西流逕水門口湯泉自



西北來入之又西南入薊州東界淋河合興龍口  
之水自北來會焉又西南至南河莊薊州北山諸  
泉水來入之逕城南五里橋迤邐西南流逕上倉  
折向南流至下倉折向西流至嘴頭村洵河合周  
村黃頌等河自西北來會之至白龍港入寶坻縣  
界淤泥河自西南來入之折向東南流逕新安鎮  
至小河口小泉河合藍泉水自北來入之逕曹家  
口頭折而南至于家口頭迤邐西南流至大沽莊

復折而東南至王家莊又折而西逕長亭店復折而南徑八門城迤邐東南流至盛家莊還鄉河北支自東北來會又東南至江潢口還鄉河南支自東北來入之逕梁城所北分流環城仍合于城南又東南逕蘆台軍糧城會天津新河入海

統按薊運河源高派繁河形曲折每汎發漲溢潰決堤岸淹沒田廬而寶坻地勢最下受害尤劇雍正四年 怡賢親王奏請築堤起自三河

縣之料馬莊迄於寶坻縣之江漢口長一百八十餘里屹然高厚居民以為保障焉又以堤內地窪西北一帶村莊雨潦停積每妨耕稼委舊令程璇相度於魯沽莊建石閘一座長亭莊建涵洞一座又於張頭窩建涵洞一座潮汐通流民間得以汲飲兼資灌溉雨水過多則洩而出之從此寶坻永離昏墊比年豐稔畿東樂國矣

還鄉河 即漚水亦名環香河源出遷安縣泉莊黃山之麓一泉涌出匯為方塘澄碧中噴珠纍纍西流成河水勢甚駛至岩兒口入豐潤之東北界又西逕五峰頭至韓家厓頭迤邐西南流至窪答村折而南逕東馬莊又折而西徑豐潤城北迤邐西南流至張官屯入玉田縣之東南界又西南至蠻子營沙流河自北來入之逕鴉鴻橋至運河頭復折而南自此河身頓狹斗折蛇行至趙官屯分為

二股一西南流逕掾子莊牛見頭至盛家莊入薊  
運河一南流逕九丈窩豐臺鎮至江潢口入薊運  
河方輿紀要漕水一名還鄉河或謂之雲漕水燕  
山叢談凡水皆自西而東此水獨西俗謂之還鄉  
河水利備考明初用遮洋舡從直沽出海轉餉薊  
州天順二年開直沽河歲久復湮嘉靖四十五年  
詔濬豐潤縣還鄉河轉運太平等寨軍餉於北齊  
莊張官屯鴉鴻橋特設三閘以瀦水焉按還鄉河

源非甚鉅但近自北山而下夏秋雨集諸山水潦  
一時迸注而鴉鴻橋以下河窄流紆不能驟洩則  
溢出為田疇害東決則淹豐潤西決則淹玉田雍  
正四年 怡賢親王奏於劉欽莊王木匠莊河流  
甚曲之處各開直河一道與舊河兩處分洩沿河  
堤岸遂加修築其橡子莊牛見頭一帶出口河身  
亦濬疏寬深沿河沮洳之場皆成膏壤矣

塌河淀 一名大河淀即北運河筐兒港藉以蓄洩

者也舊隸武清縣今改隸天津縣一統志在城東北四十里周百里按此淀上無來源下通潮汐以陳家溝賈家沽二河為出納焉南北廣十五六里東西長二十餘里東南有小河一道出西堤頭逕城兒上入七里海

七里海 即北運河青龍灣藉以蓄洩者也一統志在寶坻縣東南一百三十里汪洋如海為縣巨浸按七里海亦無源之水也地形窪下聚潦歸焉海

之西北為後海後海之西北為鯽魚洶又北為香  
油洶海東南為曲里海雨多水滙則極目無涯旱  
乾之年諸洶皆涸唯七里海尚有寧車沽一道下  
通北塘潮汐往來水常不竭然亦盈盈淺瀨而已  
沽道既狹舟楫販易之所不至瀕海居民採蒿子  
為糧雍正四年冬 怡賢親王查歷至此惻然憫  
之五年委員開挖寧車沽河起自淮魚洶達於北  
塘口長四十里拓濬深通估帆來往小民生計賴



以紆焉

按荒政要覽有言古之立國者必有山林川澤之利川主流澤主聚川則從源頭達之澤則從委處蓄之川流淤阻其害易見人皆知濬治者萬頃之湖千畝之蕩鮮知究心甚有縱豪強阻塞規覓小利不知澤不得川不行川不得澤不止二者相為體用易卦坎為水坎則澤之象也為上流之壑為下流之源全繫乎澤澤廢是無

川也況國有大澤滂可為容旱可為蓄必究晰  
於此而水利之說可徐講矣畿輔之內大澤有  
六曰大陸澤曰寧晉泊曰西淀曰東淀曰塌河  
淀曰七里海皆以止川流而蓄聚潦焉二泊兩  
淀源深流長其容蓄之功易見唯塌河淀與七  
里海既無大源每多涸竭附近居民往往占耕  
為業報墾升科而地方有司不察其為淀與海  
也亦聽其阻塞或反以開荒增賦為已最近年

以來筐兒港壩口拓寬滾水浸多塌河淀周圍  
田地率以水估除糧計畝受價矣然此等本皆  
積淀偶涸成田當日若不聽其報墾豈不省此  
一番償補耶今七里海年來涸減浦淑變為萊  
蕪間亦有報糧認業者寶坻地本卑窪唯近城  
二三十里為高壤故縣以坻名取水中之坻為  
義也雨水過多全恃七里海為容蓄不致氾濫  
成灾若乘其減涸逐漸認耕規小利而廢此大

澤所害多矣况青龍灣壩河滾水以此為壑一  
遇水多之歲田復成海又為之除糧給價豈不

虛糜

國帑乎留心地方者當知澤之為利凡淀泊涸出之地  
毋得聽民壑認不可不通行而厲禁也

畿輔通志卷四十五